

## 題目：我上愛去的所在

Guá siōng ài khi ê sóo-tsāi

陳莉玲老師、郭書含同學

「書含，物件攞攞好啊袂？卡緊 e，欲出發啊……。」每一擺放假，我上期待 e 就是去蹠庄跤 e 阿公阿媽兜，彼个所在就是我上愛去 e 所在。

佇遐，天氣好，真少落雨，毋管時，天擺是嬌啊，袂輸若有人搨掃過，風一陣一陣微微啊吹，一坵一坵 e 稻仔親像海面 e 水湧，輕輕啊洄過來閣搖過去，三不五時閣會聽到足濟足濟不知名的動物，唱出真濟奇怪 e 聲音，那唱，我那聽，彼攞是我佇新竹真罕得聽見 e 聲，予我感覺足心適閣足趣味 e。

一行到厝外，燒熱 e 日頭，照佇我 e 身軀，親像日頭伯咧替我掠龍，這種感覺，實在真爽快！

除了人看人呵咾 e 風景以外，佇阿公兜閣有足濟好耍 e 代誌，阿公 in 門口埕有一樣足大樣 e 榕仔(tshing-á)，會使予阮覘相揣，走來走去，peh 懸 peh 低，耍忝啊，腹肚嘛枵啊，我就會走去灶跤看今仔日阿媽欲攞啥物好料予阮食，若是拄著我上愛食 e 炕肉，我就會隨偷拈(ni)一塊起來，窒(that)我 e 喙空，若無細膩予阿媽看著，阿媽袂受氣，顛倒會笑笑摸我 e 頭，講：「你真正是枵鬼困仔……。」這 e 時陣，我就 e 恰阿媽司奶講：「彼是因為阿媽煮 e 炕肉太好食啊，我才會擋袂牢啦！」每一擺，我講煞，阿媽就會笑甲嘴啊離腮腮，心花一直開。

食飽，大家相招去厝後彼條溪釣魚，這條溪水清清，水底 e 魚啊、蝦啊攞看現現，阿公幫我甲杜蚓仔勾佇咧釣鉤頂頭，我就會使開始釣，釣魚愛有耐心，閣袂使講話，雖然等待 e 時間足長 e，毋過，我顛倒會使趁這咧時陣，好好欣賞庄跤美麗 e 風景，遠遠 e 彼片山，懸懸低低，不時有幾隻白翎鷺飛過山頭，白色 e 鳥，藍色 e 天，青色 e 山，鬥鬥咧，就親像一幅上嬌 e 圖。佇我看恰失神去 e 時陣，「書含，有魚咧食餌啊……。」阿公雄雄喝一聲，害我 e 魚釣仔險險落(lak)落(lók)去水底，佳哉阿公恰我鬥相共，趕緊恰魚換起來。「哇！足大尾 e，今仔日下暗，有魚通加菜囉！」這就是釣魚 e 趣味，嘛是來阿公兜才會使做 e 代誌。

阿公阿媽兜是我上愛去 e 所在，佇遐，我會使感受到庄跤 e 好，庄跤 e 嬌，上重要 e，是我會使感受到阿公阿媽對我 e 愛。所以，阿公阿媽兜就是我上愛去 e 所在。